

16. november 2020

UPA2020/11

Erik Jensen

**2019-imut Nunatta Karsiata naatsorsuutaasa akuersissutigineqarnissaannik siunnersuut**  
(Aningaasaqarnermut Akileraartarnermullu Naalakkersuisoq)

Soorlu siullermeerinninnermi Siumumiit oqaatigisatsittuut ilisimatitsissutigissavarput nunatta karsiata naatsorsuutai upernaakkut siulleerreqartarnerat ingerlasaraluarimat, aatsaallu ukiakkut inaarutaasumik suliarineqartaraluarlutik. Kisiannili tassa ilisimaneqartutuut nunarsuarmi corona-p ajornartoortitsisimanera peqqutigalugu maanna pissutsit naliginnaasut allaanerupput, taamaattumillu maanna ukiakkut nunatta karsiata naatsorsuutai aatsaat siullermeerlugillu aappassaaneerreqartussanngorput.

Aasap ingerlanera tassa juulip 22. aamma 23.-iani ataatsimiisitaliami tamattaalluta aammalu tamatumap kingorna ataatsimiisitaliami arlaleriarluta Nunatta Karsiata 2019-imut naatsorsuutai pillugit misissorluaqqissaarsimavagut. Tamatumallu kingunerisaanik aamma Naalakkersuisut apeqqutinik arlalinnik apuussaqsarimalluta, akissuteqarfigineqartunit. Akissuteqaatillu akissuteqaataallu Inatsisartut nittartagaanni bilag 6-itut ikkunneqarsimasut innersuussutigissavagut.

Siumumiit maluginiarparput Nunatta karsiata 2019-imut naatsorsuutai pillugit isumaliuutissiisummi sammineqartut ilaat, ukiuni kingullerni arlalinni kukkunersiuisut oqaaseqaataat (revisionsprotokollat) malillugu aaqeqquneqarlutik allaaserineqartarsimasut. Taakkulu "taamaattussaannartut" isigineqalinnginnissaat eqqarsaatigalugu Naalakkersuisunut kaammattuutigissavarput, kukkunersiuisut oqaaseqaataanni soorlu immikkoortoq 3-ip iluaniittut pitsanngorsaaviginissaat suliareqqullugit. Taamaasiornikkut aappaagumut naatsorsuutit suliarineqalerpata alloriartoqarsimaneranik takusaqarnerussagatta. Siumumiilli matumani maluginiarparput ilaatigut tamanna aaqqiviginiarlugu nutaamik system-imik soorlu ERP system-imik atilimmik aningaasaliinikkut pitsanngorsaaniarnerit annertumik ukkatarineqalersimasut.

Ukiuni kingullerni sinerissami Allorfiit pilersiortornerat aammalu innuttaasunut "akeqanngitsumik" katsorsartittarneq ilisimavarput. Tamanna immini ajunngilaq. Ataatsimiisitaliamili eqqartorsimavarput ilumut aningaasaliissutit ajunngitsumik kinguneqartarnerannut uuttusersuinissat pisariaqartut (effektmåling). Taamaasiornikkut aningaasaliisarnerit qanoq sunniuteqartarnerisut takusinnaaneqartarlerniassammata.

Taamatuttaaq aamma isumaqarpugut Namminersorlutik Oqartussat aammalu kommuuninut akornaminni isumaqatigiissuteqartarneranni (bloktilskud) aningaasat atorfissaannut atorineqartarnissaat suli annerusumik piumasaqaateqarnerusariaqartoq. Tassami assersuutigalugu illulioqatigiilluni imaluunniit sanaqatigiilluni illuliortarnernut aningaasaliissutit ilumut atorineqarfissaminnut atorineqartarnissaat qulakkeerreqartariaqarpoq. Sinerissamini

aammalu inoqafinni minnerusuni nunaqafippassuarnilu sanaartorneq annerulersinniarlugu aningaasaliissutit pisaraluartut, aningaasaliissutaasut ilumut eqqortumik atorneqarnerat qulakkeerneqartariaqarmat.

Siumumiik maliginiakkatta ilagaat 2018-imuut 2019-imut avataaniit siunnersorneqarnermut aningaasaliissutaasartut qaffariarsimanerat. Tasami 2018-imi 189 mio. atorneqarsimasut 2019-imi 284 mio. qaffariarsimammat. Tamannalu ineriartorneq pitsaasuunngitsoq Siumumiik isumaqarpugut. Avataaniillu siunnersortinut aningaasat atorneqarnerat malunnaatiimmik apparsarneqanissaa suliarineqartariaqarpoq.

Naggataatigut Siumumiik oqaatigissavarput Nunatta karsiata 2019-imi naatsorsuutai Ingerlatsinermi, Sanaartornermi, Taarsigassarsititsinerlu (DAU: Drift Anlæg Udlån-imik taaneqartartoq) aallaavigalugu 137 mio.-inik sinneqartoorfiusoq iluarisimaaratsigu. Aammalu nuanaarutigatsigu kukkuneruisut Nunatta karsiata naatsorsuutai nangaanartortaqtartinneqaratik pitsaasumik naammassineqarsimammata.

Taamatut oqaaseqarluta nunatta karsiata naatsorsuutai, naatsorsuutillu sinneri malitsigisai ilanngullugit Siumumiik akuersissutigissavagut, naatsorsuutigalugu oqaaseqaatigisagut ilanngullugit pitsanngorsaaqqinnisat Naalakkersuisuniit suliarineqassasut.

Erik Jensen - Siumut